

BATISIM DAL SIGNÔR

Jutoris pe Liturgjie

Ai 13 di Zenâr dal 2019

Cu la fieste dal batisim dal Signôr si conclût il cicli dal Timp di Nadâl. In chestis zornadis la liturgjie nus à visâts che a Betlem us è nassût un salvadôr... un frut invuluçât tes fassis (Lc 2, 11.12); te Pifanie o vin savût midiant de stele e dai magjos che lui al è il Messie (Mt 2, 4) prometût ai forescj, a ducj i popui; vuê nus ven palesât che il Messie nol è dome om ma Fi di Diu: dal cîl e rivà une vôs: Tu tu sês gno Fi.

Dut chest al è platât e rivelât te tenarece che il frut pognet inte grepie (Lc 2, 16) al fâs florî in nô; cheste “tenarece di Diu tun frut” nus compagne ancje tal vanzeli di vuê cuant che Jesù al jere sui trente agns e al scomençà il so ministeri (Lc 3, 23) cul batisim tal Jordan.

Al è normâl in cheste ocasion pensâ ancje al nestri batisim e al significât dal batisim te glesie: un sacrament, umiliât e trascurât, come che al dîs pape Francesc parcè che il clericalismo non solo annulla la personalità dei cristiani, ma tende anche a sminuire e a sottovalutare la grazia battesimale che lo Spirito Santo ha posto nel cuore della nostra gente (Letare al popul di Diu).

Duncje cheste fieste nus svicine a contemplâ il misteri di Jesù ma è à ancje di fânus rifleti sul sacrament dal batisim che o vin ricevût. Nus somearà strani ma la dignitât dal cristian e ven di chê risultive li e di li e partîs la dignitât dal laic soledut tai paîs cence predi.

La antifone di jentrade nus consegne cun limpidece la glagn de messe di vuê.

Antifone di jentrade

cf. Mt 3,16-17

A pene che Gjesù al fo batiât si vierzerin i cîi
e il Spirt al restà parsore di lui come colombe
e la vôs dal Pari e disè:

Chel chi al è gno Fi il preferît,
là ch’o ai metude dute la mê contentece.

Si dîs Glorie a Diu.

Colete

Diu onipotent e eterni,
che daspò dal Batisim di Crist tal flum Gjordan
tu lu âs proclamât a plene vôs come to Fi plui cjâr,
biel che il Spirtu Sant al vignive jù sore di lui,
daur ai fîs che tu âs adotât,
tornâts a nassi da l’aghe e dal Spirtu Sant,
di condurâ par simpri tal to bonvolê.
Pal nestri Signôr Gjesù Crist to Fi, ch’al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 40,1-5.9-11

Si pandarà la glorie dal Signôr e ogni om le viodarà.

Il profete (secul VI p.d.C.) al nunzie che la sclavitût di Babilonie e sta finint e i tibiâts a tornaran a Jerusalem. Jerial pussibil? Ai depuartâts ur someave di riviodi i miracui dai timps dal Esodo sot di Mosè. Il salm 126 al dîs: In chê volte nus pareve di insumiâsi.

Cheste leture e fâs olma ben il mes dal Batiste e il moment storic dal batisim di Jesù, ma e pues iluminâ ancje il moment che o stin vivint.

+E à vût de man dal Signôr il dopli par ducj i siei pecjâts. *Cjalant a lis glesiis che si svueidin, chestis peraulis puedino judânus a capî alc?*

+Tal desert prontait la strade dal Signôr! *La nestre situazioni ise paragonabil a un desert? Sì o no? Parcè?*

+Concje *des porcariis* - mont *de supierbie* - culine *de mediocritât*... *Come persone, popul, glesie si cjatîno dentri? Cemût començâ a rimedeâ?*

+*E dome dopo fat chest si pandarà la glorie dal Signôr: si viodarà che lui al puarte i agneluts, noaltris e la nestre int, sul pet.*

Dal libri dal profete Isaie

«Consolait, consolait il gno popul,
al dîs il vuestri Diu.

Fevelait al cûr di Gjerusalem
e contait

che la sô vore e je finide,
che la sô colpe e je scontade,
ch'è à vût de man dal Signôr
il dopli par ducj i siei pecjâts».

Une vôs e berle:

«Tal desert prontait
la strade dal Signôr!

Ogni concje ch'è sedi colmade,
e ogni mont e culine ch'a sedin sbassadis,
il teren grumbulôs ch'al deventi plan
e chel di rive une concje;
alore si pandarà la glorie dal Signôr
e ogni om le viodarà;
parcè che la bocje dal Signôr e à fevelât».

Va sù suntune mont alte,

tu che tu quartis buinis gnovis in Sion!

Alce a fuart la tô vôs,

tu che tu quartis buinis gnovis in Gjerusalem!

Alcile, e no sta vê pôre!

Disiur a lis citâts di Gjude:

«Ve, il vuestri Diu!

Ve, il Signôr Diu

al ven indenant cun fuarce,

cul so braç lui al parone dut;

ve, al à daûrsi il so premi,

la sô pae e cor denant di lui.

Come un pastôr lui al passone il trop,

lu tire dongje cul so braç,

al puarte i agneluts sul pet,

e al fâs lâ indenant biel planc lis pioris ch'a dan di lat».

Peraule di Diu.

Culì e je dome une cerce dal salm 103 (Salteri n. 104): une grande cjantôse su lis maraveis de creazion. Ancje nô cuant che o cjalìn i documentaris sientifics o concludìn: Cetantis robis che tu âs fatis, Signôr! E dut tu âs fat cun sapience.

In cheste messe, dopo de prime leture, la cjante di gjubilo si riferìs al Diu Liberadôr dai puars e dai sclâfs.

E pensant al batisim di Jesù ce aie di vê provât la int, cuant che si spalancà il cîl ?

R. Benedet il Signôr ch'al regale la vite.

Se cjantât: Il cjant dai salms responsoriâi, p. 193.

Tu sês propit grant, Signôr, gno Diu!
Sflandôr e maiestât al è il to vistît,
invuluçât di lûs tant che di une manteline.
Lui al plante i cîi tant che une tende. **R.**

Al fâs sù lis sôs stanziis parsore des aghis;
al fâs il so cjar cui nûi,
su lis alis dal vint al cjamine;
al fâs diventâ siei mes i aiars,
siei fameis lis flamis ch'a saetin. **R.**

Cetantis robis che tu âs fatis, Signôr!
E dut tu âs fat cun sapience:
la tiere e je plene incolme des tôs creaturis.
Ve il mâr, grant e larc cence spuinde;
nemâi piçui e grancj intune. **R.**

Ducj a spietin de tô bande
che tu ur dedis di mangjâ cuant che al covente.
Tu tu ur al proviodis e lôr int gjoldin;
tu spalanchis la tô man e di ogni ben si sostentin. **R.**

Tu taponis la tô muse e lôr si smamissin;
tu ur gjavis la soflade e lôr a muerin,
e tal lôr pulvin a tornin.
Tu mandis la tô soflade e lôr a vivin,
e cussi tu fasis gnove cree la face de tiere. **R.**

SECONDE LETURE

Tt 2,11-14; 3,4-7

Il Signôr nus à salvâts cuntune lavade di rigjenerazion tal Spirtu Sant.

Tancj e profonts a son i pinsîrs di cheste seconde leture e no si savarès ce sielzi parcè che dut culì nus pant alc di grant. Al conven scoltâ cun calme; dopo, il cûr nus disarà dulà poni la nestre anime te contemplazion e te preiere.

De letare di san Pauli apuestul a Tito

Benedet, e je comparide la gracie di Diu, che ur à puartade la salvece a ducj i oms e nus à insegnât a vivi in chest mont cun sintiment, cun justizie e religion, rinunciand a la tristerie e a lis vois dal mont e spietand la sante sperance e la manifestazion de glorie dal grant Idiu e nestri salvadôr Gjesù Crist, che si è dât vie dut par nô par sfrancjânus di ogni inicitât e purificâ par sè un popul ch'al sedi dome so e al vedi grande passion tal fâ oparis di ben.

Chestis robis tu âs di predicjâlis e tignîlis batudis, corezint cun dute la tô autoritât. Nissun nol à di olsâ a mancjâti di rispîet!

Ma cuant che e je comparide la bontât di Diu nestri salvadôr e il so amôr pai oms, lui nus à salvâts no in virtût des oparis ch'ò varessin vudis fatis te justizie, ma seont il so boncûr, cuntune lavade di rigjenerazion e di rinovament tal Spirtu Sant che lui al à sborfât sore di nô cence culumie midiant di Gjesù Crist nestri salvadôr, par che, justificâts cu la sô gracie, o diventassin erêts de vite eterne seont la sperance.

Peraule di Diu.

CJANT AL VANZELI

cf. Lc 3,16

R. Aleluia, aleluia.

Al ven un ch'al è plui fuart di me, al dîs Zuan;
lui us batiarà tal Spirtu Sant e tal fûc.

R. Aleluia.

VANZELI

Lc 3,15-16.21-22

Gjesù al fo batiât e, biel ch'al stave preant, si spalancà il cîl.

Se la Pasche Tafanie e je la floridure dal cidin di Betlem, il batisim di Jesù al è il flôr di trente agns di vite di país, di lavôr e di riflession tal cidin di Nazaret.

+Dut il popul si faseve batiâ: *o vin di fâsi batiâ ancje nô par cambiâsi tun popul ch'al sedi dome dal Signôr* e al vedi grande passion tal fâ oparis di ben.

+*Pal gnûf batisim o vin dome di stâ in companie di Jesù e no smenteâ i tribulâts; lui stes nus batiarà tal Spirtu Sant e tal fûc.*

+Si spalancà il cîl: *parcè che in Crist si son riconciliadis dutis lis robis de tiere e dal cîl, fasint pês, ancje lis nestris (Co 1, 19. 20).*

+Come une colombe: *il Spirt di Crist tal diluvi de vite e je come...: la colombe e tornà dongje che e veve un ramaçut di ulîf gnûf crevât cul bec (Gjen 8, 11).*

+Tu tu sês il gno Fi: *in Crist e scomparis ch'è perauale: Il Signôr si pinti di vê fat l'om (Gjen 6, 6).*

A conclusion dal cicli di Nadâl o podin dî cun Natanael: Rabi, tu tu sês il Fi di Diu, tu sês il re di Israel (Zn 1, 49).

E domenie che e ven si cjatarin in cualchi maniere preparâts a cjâlâ a la vite publiche di Jesù.

Dal vanzeli seont Luche

In ch'è volte, il popul al jere simpri di plui in spiete e ducj si domandavin tal lôr cûr se Zuan nol fos il Messie. Alore Zuan ur rispuindè: «Jo us batii cu l'aghe, ma al ven un ch'al è plui fuart di me, che no mertî nancje di dispeâi la coree dai siei sandui. Lui us batiarà tal Spirtu Sant e tal fûc».

Dut il popul si faseve batiâ, e al fo batiât ancje Gjesù. E biel ch'al stave preant, si spalancà il cîl e il Spirtu Sant al dismontà jù sore di lui in forme di un cuarp, come une colombe. E dal cîl e rivà une vôs: «Tu tu sês il gno Fi plui cjâr, in te o ai metude dute la mê contentece».

Peraule dal Signôr.

Si dîs O crôt.

Su lis ufiertis

Acete, Signôr, i regâi che ti presentin te rivelazion dal to Fi tant cjâr,
e fâs che l'ufierte dai tiei fedêi
si trasformi tal sacrifici di chel ch'al à volût parâ jù il pecjât dal mont
parcè che al veve dûl di nô.

Lui ch'al vîf e al regne tai secui dai secui.

Antifone a la comunion

Zn 1,32.34

La testimoniance di Zuan e je cheste:

Jo lu ai viodût e o ai testimonieât che lui al è il Fi di Diu.

Daspò de comunion

Sostentâts cul sant regâl, Signôr,
o prein cun dute umiltât il to boncûr
di scoltâ cun fedeltât la vôs dal to Unigjenit
e di jessi clamâts e di jessi pardabon tiei fîs.
Par Crist nestri Signôr.

* * *

Riflession di pre Antoni Beline: **Us batiarà tal Spirtu Sant e tal fûc**

Dutune cul batisim di Crist te aghe dal Jordan, la Glesie vuê nus invide a pensâ par un lamp amancul, al gran moment de nestre vite che ancje nô o vin vude cheste aghe, anzit chest Spirtu Sant e chest fûc, moment fundamentâl che magari si impensin tant che l'ore di murî.

Il batisim di Zuan al jere un batisim di pinitince. Vadi plui che virtût di smondeâ al veve la funzion di stiçâ...

Vanseli par un popul, an C, p. 43

* * *

Cjants di Nadâl

Dal libri "Hosanna":

Adeste, fideles, *n. 106;*
Anin fin a Betlem, *n. 107;*
Hitite, kristjan, *n. 108;*
Fedeli, venite, *n. 109;*
O fi di Eve jeviti, *n. 111;*
Ve che jo o stoi ae puarte, *n. 113;*
Dio s'è fatto come noi, *n. 114;*

Fieste dal batisim di Jesù

Cui mi dîs ce tantis stelis, *n. 1;*
Crist nus vûl bon, *n. 3;*
La creazione giubili, *n. 5;*
Come a l'aghe de fontane, *n. 135;*
Quanta sete nel mio cuore, *n. 136.*

* * *

O saludin chest timp di Nadâl e o ringraciìn il Signôr che si sin cjatâts

Lui cun nô, nô cun Lui.

Tignint in cûr la tenarece dal *frut che al jere pognet intr grepie* si ricuardin che:

E lui, clamât dongje un frut, lu metè framieç di lôr e ur disè:

***"Us al dîs in veretât: se no si convertissarês e no deventarês come i fruts,
no jentrarês tal ream dai cûi.***

***Partantchel che si fasarà piçul come chest frut,
chel al sarà il plui grant tal ream dai cûi".***

Mt 18, 2-4.

* * *

Lunis 14 di zenâr

B. Durì di Pordenon, predi

Durì, nassût dongje Pordenon dal 1265 inte cjase dai Mattiussi, al jentrà tal Ordin dai Minôrs di San Francesc di Udin. Deventât predi a trente agns, si ritirà par un trat di timp intun romitori. Po al tornà tal convent, lusint pe austeritât de sô vite e pe passion pes animis. Vût il permès, si consacrà a puartâ il Vanzeli ai forescj e, frontant ogni pericul di tiere e di mâr, al rivà tes regjons plui lontanis dal Orient, a puartâur Crist ai cinês, tant di mertâsi il titul di apuestul de Cine. Di dute cheste grande peregrinazion pes regjons asiatichis, durade dal 1314 al 1330, cun trê agns passâts inte citât imperiâl di Pechin, al lassà une descrizion là che lui al detà il so itinerari. Al murì ai 14 di zenâr a Udin e li il so cuarp al fo conservât intune arceje une vore artistiche dal stes secul, traspuartade plui in ca de glesie di san Francesc a la glesie de sante Marie Virgine de Mont dal Carmêl.

***Diu, che par puartâ intal grim de Glesie i tancj popui dal Orient
tu âs colmât il beât Durì di grande fuarce interiôr e di costance,
fâs, par plasê, che lôr a puedin cressi simpri inte fede e inte santitât
e che nô o restìn salts inte sperance di chel Vanzeli che lui al à predicjât.
Par Crist nestri Signôr. Amen.***

Dal Messâl

* * *

- * *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- * *Il cjant dai salms resposoriâi, Ed. Glesie Furlane, 2012.*
- * *50 corâi de cristianitât todescje voltâts par furlan, ed. Glesie Furlane, 2016.*
- * *Il libri des riflessions sul Vanzeli al è: pre Antoni Beline, Vanzeli par un popul, an B, Ed. La Nuova Base.*
- * *Par domandâ chescj libris scrivêt a info@glesiefurlane.org*